



JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDISIÁL

Komunikadu Imprensa

7 Agostu 2013

**Julgamentu movél iha Distritu Manufahi hatudu progresu iha aspetu
protesaun ba vítima violénsia seksuál**

Hahu husi 24 to'o 26 Jullu 2013, Tribunál Distritál Suai (TDS) realiza julgamentu movél iha Distritu Same-Manufahi. Tuir orariu julgamentu movél, sei julga kazu sanolu resin tolu (13) inklui kazu 7 ne'ebé involve violénsia bázeia ba jéneru. Kazu 7 ne'e kompostu husi krime ofensa ba integridade fizika simples ho natureza violénsia doméstika 4, violénsia seksuál 1, koasaun seksuál 1 no tentativa violasaun 1.

Husi kazu 7 ne'e kazu 5 konklui ona nia prosesu no kazu 1 adia ba 6 Agostu 2013 hodi rona leitura sentensa no ida seluk 26 Outobru 2013 tanba arguidu la marka prezensa no oras ne'e nia hela iha Indonézia.

Kazu ne'ebé involve koasaun seksuál kondena ho pena prizaun tinan 2 fulan 2 maibe suspende ba tinan 4, kazu tentativa violasaun absolve tanba faktu kontrariu ba malu entre lezada no testamuña no arguidu hili direitu nonok. Aleinde ne'e, kazu ofensa ba integriade fízik simples ho natureza violénsia doméstika 3 kondena ho pena prizaun fulan 6, suspende ba tinan 1, kazu 1 kondena pena multa \$ 30.00, inklui selu taxa judisiál \$ 10.00 no ida tan omologa tanba antes ne'e parte sira iha ona akordu dame tuir makanismu família/kultura.

Tuir observasaun JSMP nian julgamentu movel ne'e hatudu progresu iha aspetu protesau ba identidade no privasidade ba kazu sira ne'ebé ho natureza violasaun seksuál no menór. Iha julgamentu ne'e, antes hahu julgamentu, tribunál husu ba audiénsia sira atu husik mamuk salaun julgamentu.

“Ne'e pasu ida ne'ebé progresivu teb-tebes tanba importante atu asegura katak vítima violénsia seksuál no menór sira tenke hetan protesau adekua durante prosesu nia laran. JSMP hanoin katak Juizes sira merese hetan apresiasaun ba mudansa ne'ebé sira halo atu proteze vítima sira,” dehan Luis de Oliveira Sampaio, Diretór Ezekutivu JSMP.

Juis ne'ebé prezide julgamentu movél ne'e mak Dr. Costânsio Barros Basmerly, Dr. Pedro Raposo de Fiquieredo (juis internasionál) no Dra. Florencia Freitas. Ministériu Públiku representa husi Dr. Felisminio Cardoso (prokurador internasionál) ho Dra. Benvinda da Costa Rosario. Defeza representa husi Dr. Marçal Mascarinhas no Dr. João Henrique husi Eskritóriu Defensória Pública.

Ofisial justisa ne'ebé responsavel durante julgamentu movél Sr. Samuel Moniz Araújo, Jose Feliciano Mau-letto no Sra. Augusta Neves.

Publikasaun ne'e limita deit ba kazu sira violénsia bázeia ba jéneru ne'ebé julga durante julgamentu movél.

Atu hetan informasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883|77295795 Website: www.jsmp.tl

Facebook: www.facebook.com/timorleste.jsmp

Twitter: @JSMPTl